




*Minggu, 02 Oktober 2022*  
**Ogen: Daniel 2:24-45**



**Petangkas Rahasia**



**G**eluh enda penuh misteri. Labo si eteh kai pagi si bakal jadi bas geluhta enda. Amin bage gia megati nge lit tanda-tanda si isingetken man banta manusia, gelah kita megermet ndalani kegeluhen. Arah nipi misalna. Amin gia rusur ikataken nipi e me rudang-rudang pertunduh, lit ka megati arah nipi e tempa-tempa jadi tanda-tanda. I bas sie labo ka sitik jelma cubakenna ngantusi nipi e alu mperbandingkenca ras tahayul-tahayul, nungkun man tua-tua, deba nungkun dukun, deba daramina ka tim doa ngantusi nipina. Jadi nggo payo kel kai sinikataken kitab Pengerana 3:11 *Ia nge simereken man banta kerincuhen lako meteh wari si pepagi, tapi la pernah iberekenNa man banta kepuasan lako ngertiken perbahanenNa.* Merincuh kal raja gelah lit sibanci nuriken nipi sialokenna bagepe mereken antusenna. I bas kerina kalak erpemeteh i istana sada Daniel ngenca pang alu la biar-biaren nurikenca man bana. Nipina e kerna kerajan-kerajan doni si italuken kinirajan Dibata. Uga kecibal kerajan-kerajan i doni enda i bas masa-masa sireh termasuk pe kerajan Babilon siipimpin Nebukadnesar. Rulih-ulih ituriken Daniel maka pengertin e rehna bas Dibata nari. Em sababna la lit turah ukur raja ernembekh ate, sebab kai nipina ras pengertinna tangkas ibahan Tuhan man bana erkelangken Daniel.

Ijenda siidah maka labo kuasa manusia mpetangkas sura-sura Dibata. Dibata jine mereken persinget ras pertenget man banta, sada rahasia si atena gelah sieteh. Ia simereken rahasia e, Ia siersura-sura gelah kita mindo ras nungkun man bana. Adi Nebukadnesar la tandaina Tuhan secara pribadi emaka perlu ia isampati Daniel. Kita singgo ngaloken Tuhan Yesus jadi juruselamatta lanai bo perlu erkelang-kelang i bas nungkun kerna rahasia geluhta man Dibata. Dia hanya sejauh doa. Ras si pasti rencanaNa i bas geluhta pasti mehuli ras meherga. Ula ragu man Tuhanta.